uoit remuer. Pendant que l'vn le lioit, vn autre éclairoit auec vn flambeau d'écorce, & tout exprez fecoüoit ce flambeau, parfemant de feu ce pauure miferable, nud comme la main, lequel ne pouuoit fe défaire de ces flammes, qui s'attachoient à fa chair, & la brufloient auec vne grande douleur; il ne crioit point neantmoins, endurant ce tourment auec vne constance digne d'étonnement.

Le vingt-deuxiesme du mesme mois, vne semme Sauuage apporta son petit sils au Fort, demandant pour luy quelques raisins ou quelques pruneaux; voyant ce pauure ensant fort malade, ie m'enquis si elle ne seroit pas bien contente qu'on le [97] baptisast, elle s'y accorda fort volontiers, on le porte tout sur l'heure à la Chapelle, Monsieur le General se trouuant là voulut estre son Parrain, il luy donna nom Theodore, il sut baptisé solemnellement en la presence de la plus part de nos François.

Voila tous ceux qui ont esté baptisez aux Residences plus proches de Kébec, tous les autres ont esté faits Chrestiens aux Hurons. La Relation de ces Païs si éloignez, que i'enuoye, en fera mention, comme aussi de beaucoup d'autres choses fort remarquables.